



乾因

騏話

子錄





因 話 錄

趙 璘 撰

叢書集成初編

(補印本)

因話錄及其他一種

一九三九年十二月初版
一九五九年十月補印

商務印書館出版

上海市印刷四廠印刷

因話錄卷第一

唐 員外郎趙璘撰

宮部

玄宗柳婕妤余母之叔曾生延王玢婕妤有學問。肅宗每見王，則語左右曰：我與王兄弟中更相親，外家皆

關中貴族，柳氏乃尚書右丞範之女，睦州刺史齊物之妹也。柳氏姻眷，奕葉貴盛，而人物盡高，方與公，康城公，皆北史有傳。睦州刺史諱齊物，尚書

右丞之子，右丞諱範，國史有傳，少而俊邁，風格精異，能為江南折桂書生，詠調精絕，見媚於時，自周隋已後，家富於財，嘗因調集，至京師，有名娼媼陳者，姿藝俱美，為士子所奔走，睦州君詣之，悅焉，媼陳曰：第中有錦帳三十

重，即奉事終身，蓋將以斯言戲之耳。翌日，遂如數載席帳以行，媼陳大驚，且賞其奇特，竟如約，入柳氏之家，執僕隸之禮，為中表所推，玄宗在人間，常聞媼陳名，訪之，及召入宮，涕泣稱痼疾且老，上知其不可強也，許其歸。

因語曰：我聞柳家多賢子女，可以稱內職者，可言之。媼陳以睦州君女弟對，遂納之，立媼好，生延王及一公主焉。睦州君閨門士行，為官政績，載於家傳，此偶因媼陳事書之。

肅宗在春宮，嘗與諸王從玄宗詣太清宮，有龍見于殿之東梁，玄宗目之，顧問諸王有所見乎？皆曰：無之。

問太子：太子俛而未對，上問頭在何處？曰：在東，上撫之曰：真我兒也。

安祿山入覲，肅宗屢言其不臣之狀，玄宗無言。一日，召太子諸王擊毬，太子潛欲以鞍馬傷之，密謂太子

曰：吾非不疑，但此胡無尾，汝姑置之。

政和公主，肅宗第三女也，降柳潭，肅宗宴于宮中，女優有弄假官戲，其綠衣秉簡者，謂之參軍樁，天寶末

蕃將阿布思伏法，其妻配掖庭，善為優，因使隸樂工，是日，遂為假官之長，所為樁者，上及侍宴者笑樂。

公主獨俛首。嚙眉不視。上問其故。公主遂諫曰。禁中侍女不少。何必須得此人。使阿布思。眞逆人也。其妻亦同刑人。不合近至尊之座。若果冤橫。又豈忍使其妻與羣優雜處爲笑謔之具哉。妾雖至愚。深以爲不可。上亦憫惻。遂罷戲。而免阿布思之妻。由是賢重公主。公主卽柳晟之母。

代宗獨孤妃薨。贈貞懿皇后。將葬。尙父汾陽王在邠州。以其子尙主之故。欲致祭。遍問諸從事。皆云。自古

無人臣祭皇后之儀。汾陽曰。此事須得柳侍御裁之。時予外伯祖殿中侍御史。諱芳。字伯存。掌汾陽書記。奉

使在京。卽以書急召之。旣至。汾陽迎笑曰。有切事。須藉侍御爲之。遂說祭事。殿中君初亦對如諸人。旣

而曰。禮緣人情。令公勳德不同常人。且又爲國姻戚。自令公始。亦謂得宜。汾陽曰。正合子儀本意。殿中

君草祭文。其官銜之首。稱駙馬都尉郭曖父。其中敍特恩許致祭之意。辭簡禮備。汾陽覽之大喜。其文

列於左。

維某年月日。駙馬都尉郭曖父。關內河東副元帥。司徒兼中書令。汾陽郡王臣子儀。謹遣上都進奏院官傅濤。敢昭告于貞懿皇后行宮。伏惟德曜坤靈。明齊月魄。母儀萬國。化洽六宮。光輔聖人。贊成陰教。載榮史策。式播謳謠。奄達聖日。上仙靈界。遐邇痛憤。宮闈哀慕。臣幸忝諸親。男尙貴主。天人之美。鞠育所鍾。姻戚光榮。宗族咸戴。今園陵禮備。祖載及期。臣限守方鎮。不獲陪侍行宮。瞻望靈駕。不勝摧慕。伏荷皇恩。眷以國戚。許申祭禮。超越等夷。古今所絕。獨開聖造。無任惶恐銘戴之至。謹獻牲牢庶羞之奠。

尙饗。

代宗以郭尙父勳高兼連姻帝室常呼爲大臣而不名每中使內人往來必詢其門內休戚尙父二愛姬

或云南陽夫人及李夫人

嘗競寵爭長互論其公私佐助之功忿媚不相面尙父不能禁上知之賜金帛及簪鏡命

宮人載酒以和之方飲令選人歌以送酒一姬怒未解歌未發遽引蒲置觴於席前曰酒盡不須歌

郭曖嘗與昇平公主琴瑟不調曖罵公主倚乃父爲天子耶我父嫌天子不作

實詞別有所呼不言父

公主恚啼奔

車奏之上曰汝不知他父實嫌天子不作使不嫌社稷豈汝家有也因泣下但命公主還尙父拘曖自

詣朝堂待罪上召而慰之曰諺云不癡不豐不作阿家阿翁小兒女子閨幃之言大臣安用聽錫賚以

遣之尙父杖曖數十而已

德宗初嗣位深尙禮法諒闇中召韓王食馬齒羹不設鹽酪皇姨有寡居者持節入宮粧飾稍過上見之

極不悅異日如禮乃加敬焉

德宗初登勤政樓外無知者望見一人衣綠乘驢戴帽至樓下仰視久之俛而東去上立遣宣示京尹令

以物色求之尹召萬年捕賊官李鎔使促求訪李尉佇立思之曰必得及出召幹事所由於春明門外

數里內應有諸司舊職事伎藝人悉搜羅之而綠衣者果在其中詰之對曰某天寶教坊樂工也上皇

時數登此每來鷗必集樓上號隨駕老鷗某自罷居城外更不復見今羣鷗盛集又覺景象宛如昔時

心知聖人在上悲喜且欲泣下以此奏聞勅盡收此輩却係教坊李尉亦爲京尹所擢用後至郡守

德宗嘗暮秋獵於苑中是日天色微寒上謂近臣曰九月衣衫二月衣袍與時候不相稱欲遞遷一月何

如左右皆拜謝。翌日命翰林議之。而後下詔。李趙公吉甫時爲承旨。以聖人能上順天時。下盡物理。表請宣示萬方。編之於令。李相程初爲學士。獨不署名。具狀奏曰。臣謹按月令。十月始裘。月令是玄宗皇帝刪定。不可改易。上乃止。由是與吉甫不協。

德宗躬親庶政。中外除授無不留神。余伯父自監察裏行浙東觀察判官。特授高陵縣令。裴尙書武亦自鄜坊監察宰櫟陽。二人同制。後數日。因遊苑中有執役者。上問何處人云。是高陵百姓。上曰。汝是高陵人也。我近爲汝揀得一好長官。知否。伯父諱儉。貞元三年進士及第。當年制策登科。

憲宗初徵柳宗元。劉禹錫至京。俄而以柳爲柳州刺史。劉爲播州刺史。柳以劉須侍親。播州最爲惡處。請以柳州換。上不許。宰相對曰。禹錫有老親。上曰。但要與惡郡。豈繫母在。裴晉公進曰。陛下方侍太后。不合發此言。上有愧色。旣而語左右曰。裴度終愛我切。劉遂改授連州。

憲宗知權文公甚真。後權長孺知鹽鐵福建院。賊汚盈積。有司以具獄奏。上曰。必致極法。崔相羣救之云。是德輿族子。上曰。德輿必不合。有子弟犯賊。若德輿在。自犯賊。朕且不赦。況其宗從也。及知其母年高。乃免死。杖一百。長流康州。

文宗將有事南郊。祀前本司進相撲人。上曰。我方清齋。豈合觀此事。左右曰。舊例皆有。已在門外祇候。上曰。此應是要賞物。可向外撲了。卽與賞物令去。又嘗觀鬪雞。優人稱歎大好雞。上曰。雞旣好。便賜汝。文宗賜翰林學士章服。續有待詔欲先賜本司者。以名上。上曰。賜君子小人不同日。且待別日。

文宗欲以章宣州溫爲翰林學士。章以先父遺命懇辭。上後謂次對官曰：「章溫朕每欲用之，皆辭訴。又安用章溫？聲色俱厲。」戶部崔侍郎蠡進曰：「章溫稟其父遺命耳。」上曰：「溫父不令其子在翰林，是亂命也。豈謂之理乎？」崔曰：「凡人子能遵理命，已是至孝。況能稟亂命而不改者，此則尤可嘉之。陛下不可怪也。」上曰：「然乃止。」

文宗時有正塔僧履險若平，換塔杪一柱，傾都奔走，皆以爲神。上聞之曰：「此塔固由人工所成，當時匠者豈亦有神？」沙門後果以妖妄伏法。

文宗對翰林諸學士，因論前代文章。裴舍人素數道陳拾遺名，柳舍人環目之，裴不覺。上顧柳曰：「他字伯玉，亦應呼陳伯玉。」

武宗時李崖州嘗面奏處士王龜志業，堪爲諫官。上曰：「龜是誰子？」對曰：「王起之子。」凡言處士者，當是山野之人。王龜父大僚，安得居山野，不自合有官？李無以對。又將賜杜悰之子無逸衣，所司條列數目，其衫色未奉進旨。上久之，言曰：「我不可賜其白衫，年小未有官，又難假其服色，但賜青衣無衫可也。」

宣宗朝兩省官對，上曰：「卿等皆朕諍臣，切須各務公道，但無私黨，所論事必與卿行。若苟近私，雖直無益。」
時子任補
闕在外。

大中七年冬，詔來年正月一日，御含元殿受朝賀。璘時爲左補闕，請權御宣政殿。
疏曰：伏以新正大慶，萬國來朝，華夷願觀盛儀。

士庶固常符悅，但竊聞闕輔之內，類歲不登，自冬已來，降雪極少，尚須祈禱，方軫聖慈，伏見去歲之初，權御宣政，從宜之制，出自宸衷，事簡禮全，人心爲便，伏乞且推此例，停御含元，待至豐年，却依舊典，所冀觸稱萬壽，不

愆元會之期。禮酌一時。益表聖明。之美。臣官忝諫列。合陳管見。疏奏之明日。聞上謂宰臣曰。有諫官疏。來年御舍元殿事如何。莫須罷否。宰臣魏公謩奏曰。元年大慶。正殿稱賀。亦是常儀。況當無事之時。陛下肆覲百辟。朝廷盛禮。不可廢闕。上曰。近華州奏。光化賊劫下邳縣。又關輔久無雨雪。皆朕之憂。豈謂之無事。須與他罷。假如權御宣政。亦何不可也。宰臣奉詔。方欲宣下。而日官奏太陽當虧。遂罷之。其後宰相因奏對。以遺補多闕。請更除八人。上曰。諫官但要職業脩舉。亦豈在多。只如張道符、牛業、趙璘輩三數人足矣。使朕聞所未聞。

因話錄卷第二

商部上商爲臣·凡自王公·至有秩已上·皆入此部·

郭汾陽在汾州嘗奏一州縣官而勅不下判官張曇言於同列以令公勳德而請一吏致阻是宰相之不知體甚也汾陽王聞之謂寮屬曰自艱難以來朝廷姑息方鎮武臣求無不得以是方鎮跋扈使朝廷疑之以致如此今子儀奏一屬官不下不過是所請不當聖意上恩親厚不以武臣待子儀諸公可以見賀矣聞者服其公忠焉王在河中禁無故走馬犯者死南陽夫人乳母之子抵禁都虞候杖殺諸子泣告於王言虞候縱橫之狀王叱而遣之明日對賓僚吁歎者數四衆皆不曉徐問之王曰某之諸子皆奴材也遂告以故曰伊不賞父之都虞候而惜母之阿姊兒非奴材而何

余外伯祖殿中侍御史柳君諱芳·字伯存·

掌汾陽書記時有高堂之慶王每因軍中大譏常戒左右曰柳侍御

太夫人就棚可先告及趙夫人板輿至

君外族趙氏·事具家傳·

王降階與僚屬等立俟到棚而退嘗謂柳君曰子

儀早親戎事不盡奉養而孤今日幸忝重寄恩寵踰分雖爲貴盛實無侍御之榮因嗚咽不勝又曰若太夫人許降顧子儀之家使南陽夫人已下執爨子儀自捧饌具供養足矣而趙夫人以清素自居終不一往

司徒鄭真公每在方鎮崇樹公家陳設器用無不精備至於宴犒之事未嘗刻薄而居常奉身過於儉素

中外婚嫁無日無之。凡是禮物皆經神慮。公與其宗叔太子太傅綰俱住招國。太傅第在南。出自南祖。司徒第在北。出自北祖。時人謂之南鄭相。北鄭相。司徒堂兄文憲公前後相德宗亦謂之大鄭相。小鄭

相焉。其後門內居台席者多矣。

韓僕射臯爲京兆尹。韋相貫之以畿尉趨事。及韋公入相。僕射爲吏部尙書。每至中書。韋常異禮。以仲故吏之敬。又僕射爲尹時。久旱祈雨。縣官讀祝文。一心記公之家諱。及稱官銜畢。而誤呼先相公名。公但慘然。因命重讀。亦不之罪。在夏口嘗病小瘡。令醫傅膏藥。藥不濡。公問之。醫云。天寒膏硬。公笑曰。韓臯實是硬。竟不以爲事。得大賢體矣。初公自貶。所量移錢唐。與李庶人不協。後公在鄂州。綺夢萬歲樓上掛冰。因自解曰。冰者寒也。樓者高也。豈韓臯來代我乎。意甚惡之。其後公果移鎮浙右焉。自黃門以來三世傳執一笏。經祖父所執。未嘗輕授於僕人之手。歸則躬置于臥內一榻。以示敬慎。

族祖天水昭公。以舊相爲吏部侍郎。考前進士杜元穎宏詞登科。鎮南又奏爲從事。杜公入相。昭公復掌選。至杜出鎮西川。奏宋相申錫爲從事。數年。杜以南蠻入寇。貶刺循州。遂卒。宋以宰相被誣。謫佐開州。又數年。昭公始薨。公凡八任銓衡。三領節鎮。皆帶府號。爲尙書。惟不歷工部。其兵吏太常皆再往。年八十七薨。其間未嘗遇重疾。異數壽考。爲中朝之首焉。

僕射柳元公家行爲士林儀表。居大官。奉繼親薛太夫人。盡孝敬之道。凡事不異布衣時。薛夫人左右僕使。至有連小字呼公者。性嚴重。居外下輦。常惕懼。在薛夫人之側。未嘗以毅顏待家人。恂恂如小子弟。

敦睦內外。當世無比。宗族窮苦無告。因公而存立優泰者。不知其數。在方鎮。子弟有事他適。所經境內。人不知之。族子應規。爲水部員外郎。求公爲市宅。公不與。潛語所親曰。柳應規以儒素進身。始入省。便坐新宅。殊不若且稅居之爲善也。及水部歿。公撫視孤幼。恩意加厚。特爲置居處。諸子皆與身名。族孫立疾病。以兒女託公。及廉察夏口。嫁其孤女。雖箱篋刀尺微物。悉手自閱視以付之。公出自清河崔氏。繼外族薛氏。前後與舅能從。同時領方鎮。居省闈。又與繼舅萃。同時爲觀察使。妻父韓僕射。同時居大僚。未嘗敢以爵位自高。減卑下之敬。其行己如此。

權文公德輿。身不由科第。掌貢舉三年。門下所出諸生。相繼爲公相。得人之盛。時論居多。

趙郡李氏。三祖之後。元和初。同時各一人。爲相。蕃南祖。吉甫西祖。絳東祖。而皆第三。至太和開成間。又各一人。前後在相位。德裕。吉甫之子。固言。蕃再從弟。皆第九。珏亦絳之近從。諸族罕有。

李尙書益。有宗人庶子同名。俱出於姑臧公。時人謂尙書爲文章。李益。庶子爲門戶。李益。而尙書亦兼門地焉。嘗姻族間有禮會。尙書歸笑謂家人曰。大堪笑。今日局席兩箇坐頭。總是李益。

大僚睦親敦舊者。前輩有司徒鄭公。中間有楊詹事馬柳卿公。元近日李相國武都公宗閔。士大夫間罕儔。

裴尙書武奉寡嫂撫甥姪。爲中表所稱。尙書卒後。工部夫人崔氏。語其仁。輒流涕。工部名佶。有清德。武之長兄也。兄弟皆爲八座。自丞相耀卿。至工部子泰章四世。入南北省。羣從居顯列者。不可勝書。泰章後亦爲尙書。

靖安李少師。雖居貴位。不以威重隔物。與賓僚飲宴譚笑。曲盡布衣之歡。不記過失。善飲酒。暑月臨水。以荷爲杯。滿酌密繫。持近人口。以筯刺之。不盡則重飲。燕散有人言。昨飲大歡者。公曰。今日言歡。則明前之不歡。無論好惡。一不得言。段相文昌。性介狹。燕席賓客。有眉睫之失。必致恠訝。在西川有進士薛太白。飲酒稱名太多。明日遂不復召。元和己未。宰相有兩李少師。故以所居別之。永寧少師。固言性狷急。爲士大夫所非。靖安少師。事具國史。

李太師逢吉。知貢舉。勝成未放。而入相禮部。王尙書播代放勝。及第人就中書見座主。時謂好腳跡門生。前世未有。

劉桂州栖楚。爲京兆尹。號令嚴明。誅罰不避權勢。先是京城惡少。屠沽商販。多繫名諸軍。不遵府縣法令。以凌衣冠。奪貧弱爲事。有罪卽逃入軍中。無由追捕。劉公爲尹。一皆窮治。至有匿軍中。名目自稱百姓者。旬朔內。坊市姦偷宿猾。懾氣屏跡。余嘗與友生入市。市內有一軍人。乘醉誤喫友生驢。過旁諸少年。噪曰。癡男子。死日到。敢近衣冠耶。人人似頭上各有一劉尹。慄慄惴懼。不敢爲非。而與屬吏言。未曾傷氣。不叱責一官。人常謂府縣僚曰。諸公各有自了本分公事。晴天美景。任恣意遊賞。勿致拘束。

李司徒汧公鎮宣武。戎事之隙。以琴書爲娛。自造琴。聚新舊桐材。扣之合律者。則裁而膠綴。不中者棄之。故所蓄二琴。殊絕。所謂響泉韻磬者也。性不喜琴。兼箏聲。惟二寵妓曰秀奴。七七皆聰慧。善琴兼箏。與歌。時令奏之。自撰琴譜。兵部員外郎約。汧公之子也。以近屬宰相子。而雅度玄機。蕭蕭冲遠。德行旣優。又有山林之致。琴道酒德詩調。皆高絕。一生不近粉黛。性喜接引人物。不好俗譚。晨起草裏頭。對客蹙

融便過一日。多蓄古器。在湖州嘗得古鐵一片。擊之清越。又養一猿。名山公嘗以之隨逐。月夜泛江。登山擊鐵鼓琴。猿必嘯和。傾壺達旦。不俟外賓。與璘先君同在浙西使府。居處相接。慕先君家行及詩韻。契分最深。伯父高陵府君夫人章氏。卽兵部之姨妹也。余雖不及見。每聞長屬說其風格容儀。真神仙也。又傳聞汧公徐夫人。雖生二子。中年於徐夫人。琴瑟小乖。及兵部在母之後。情好加重。夫人情性益善於初。旣得君於諸子之中。寶愛懸隔。天人降謫。信不誣矣。在官所得俸祿。付與從子。一不問數。惟給奉崔氏元氏二孀姨。事事禮厚。元氏夫人有操行。祭酒弘農公旣爲傳。此不復書。君初至金陵。於府主庶人錡坐。屢讚招隱寺。擢致一日。庶人燕子寺中。明日謂君曰。十郎嘗誇招隱寺。昨遊宴。細看何殊。州中君笑曰。某所賞者。踈野耳。若遠山將翠幕遮。古松用綵物裹。腥羶浣鹿培泉。音樂亂山鳥聲。此則實不如在叔父大廳也。庶人大笑。約天性唯嗜茶。能自煎。謂人曰。茶須緩火炙。活火煎。活火謂炭火之焰者也。客至不限甌數。竟日執持茶器不倦。曾奉使行至陝州。硤石縣東。愛渠水清流。旬日忘發。

張弘靖三世掌書命。在台座前代未有。楊巨源贈公詩云。伊陟無聞祖。章賢不到孫。時稱其能與。張家說家門。巨源在元和中。詩韻不爲新語體律。務實功夫頗深。自旦至暮。吟咏不輟。

巨源年老。頭數搖。人言吟詩多致得。

裴晉公爲門下侍郎。過吏部選人官。謂同過給事中曰。吾徒僥倖至多。此輩優與一資半級。何足問也。一皆注定。未曾限量。公不信術數。不好服食。每語人曰。雞豬魚蒜。逢著則喫。生老病死。時至則行。其器抱弘達皆此類。

沈吏部傅師。性不流不矯。待物以和。觀察三方。皆脂膏之地。去鎮無餘蓄。京城居處隘陋。不加一椽。所辟賓僚。無非名士。身沒之後。家至貧苦。二子繼業。竝致時名。又以報施不妄。公先君禮部員外郎。既濟撰建中實錄。體裁精簡。雖宋韓范。亦不能過。自此之後。無有比者。公繼世爲史官。及出鎮湖南江西。奉詔在鎮脩憲宗實錄。當時榮之。

劉敦儒事親以孝聞。親心緒不理。每鞭人見血。則一日悅暢。敦儒嘗斂衣受杖。曾不變容。憲宗朝旌表門閭。又趙郡李公道樞先夫人盧氏。性嚴。事亦類此。公名問已光。又在班列。往往賓客至門。值公方受杖責。

柳元公初拜京兆尹。將赴府上。有神策軍小將。乘馬不避。公於街中杖殺之。及因對駮。憲宗正色詰公專殺之狀。公曰。京兆尹天下取則之地。臣初受陛下獎擢。軍中偏裨。躍馬衝過。此乃輕陛下典法。不獨侮臣。臣杖無禮之人。不打神策軍將。上曰。卿何不奏。公曰。臣只合決不合奏。上曰。既死合是何人奏。公曰。在街中。本街使金吾將軍奏。若在坊內。則左右巡使奏。上乃止。

因話錄卷第三

商部下

韓文公與孟東野友善。韓公文至高。孟長於五言。時號孟詩韓筆。元和中。後進師匠。韓公文體大變。又柳州宗元。李尚書翱。皇甫郎中湜。馮詹事定。祭酒楊公。余座主李公。皆以高文爲諸生所宗。而韓柳皇甫李公。皆以引接後學爲務。楊公尤深於獎善。遇得一句。終日在口。人以爲癖。終不易初心。長慶以來。李封州甘爲文至精。獎拔公心。亦類數公。甘出於李相國武都公門下。時以爲得人。惜其命運湮厄。不得在掄鑿之地。又元和以來。詞翰兼奇者。有柳柳州宗元。劉尚書禹錫及楊公。劉楊二人。詞翰之外。別精篇什。又張司業籍善歌行。李賀能爲新樂府。當時言歌篇者。宗此二人。李相國程。王僕射起。白少傅居易兄弟。張舍人仲素爲場中詞賦之最。言程式者。宗此五人。伯仲昆弟。以史筆繼業。家藏書最多者。蘇少常景胤。堂弟尚書滌。諸家無比。而皆以清標雅範。爲後來所重。少卿登第。與堂兄特竝時。亦士林之美。

廣平程子齊昔範。未舉進士日。著程子中書三卷。韓文公一見大稱歎。及赴舉。言於主司曰。程昔範不合。在諸生之下。當時下第。大振屈聲。庾尚書承宣知貢舉。程始登第。以試正字。從事涇原軍。李太師逢吉在相位。見其書。特薦拜左拾遺。竟因李公之累。湮厄而沒。其立身貞苦。能清譚樂善。士多附之。惜其位

不至耳。與堂舅李信州虞相知最深。交契至厚。有裴公夷直。皆士林之望也。

胡尚書證。河中人。太傅天水昭公鎮河中。尚書建節赴振武。備桑梓禮入謁。持刺稱百姓。獻昭公詩云。詩書入京國。旌旆過鄉關。州里榮之余。宗姪櫓應進士時。著鄉籍一篇。大誇河東人物之盛。皆實錄也。同鄉中趙氏軒冕文儒最著。曾祖父祖父世掌綸誥。櫓昆弟五人進士及第。皆歷臺省。盧少傅弘宣。盧尚書簡辭。弘正。簡求。皆其姑子也。時稱趙家出。外家敬氏先世。亦出自河中。人物名望。皆謂至盛。櫓著鄉籍載之。

楊僕射於陵在考功時。與李師稷及第。至其子相國嗣復知舉。門生集候僕射。而李公在座。時人謂之楊

家上下門生。

代有姑之壻。與姪之壻。謂之上下同門。蓋以此况也。

李相公石是庾尚書承宣門生。不數年。李任魏博軍。因奏事特賜紫。而庾尚衣緋。人謂李侍御將紫底緋上座主。

李相國武都公知貢舉。門生多清秀俊茂。唐冲、薛庠、袁都輩。時謂之玉筍。

元和中。柳柳州書後生多師倣。就中尤長於章草。爲時所寶。湖湘以南。童稚悉學其書。頗有能者。長慶已來。柳尚書公權。又以博聞強識工書。不離近侍。柳氏言書者。近世有此二人。尚書與族孫璟。開成中。同在翰林。時稱大柳舍人。小柳舍人。自祖父郎中芳以來。奕世以文學居清列。舍人在名場淹屈。及擢第。首冠諸生。當年宏詞登高科。十餘年。便掌綸誥。侍翰苑。性喜汲引後進。出其門者。名流大僚至多。以誠

明待物。不妄然諾。士益附之。記錄此書後二年。柳公方知舉。

開成三年。余忝列第。考官邢部員外郎紇于公。崔相國羣門生也。公及第日。於相國新昌宅小廳中。集見

座主。及爲考官之前。假舍於相國故第。亦於此廳見門生焉。是年科目八人。六人繼昇朝序。鄙人蹇薄。

晚方通籍。勅頭孫河南穀先於鴈門公爲丞。公後自中書舍人。觀察江西。又歷工部侍郎。節制南海。累贈封鴈門公。

裴晉公平淮西後。憲宗賜玉帶一條。公臨薨。却進使門人作表。皆不如意。公令子弟執筆。口占狀曰。內府之珍。先朝所賜。既不敢將歸地下。又不合留向人間。謹却封進。聞者歎其簡切而不亂。

晉公貞元中。作鑄劍戟爲農器賦。其首云。皇帝之嗣位三十載。寰海鏡清。方隅砥平。驅域中盡歸力穡。示天下不復用兵。憲宗平蕩宿寇。數致太平。正當元和十三年。而晉公以文儒作相。竟立殊勳。爲章武佐命。觀其辭賦氣概。豈得無異日之事乎。

進士李爲作淚賦。及輕薄暗小四賦。李賀作樂府。多屬意花草蜂蝶之間。二子竟不遠大文字之作。可以定相命之優劣矣。

相國令狐公楚。自河陽徵入至闕鄉。暴風。有裨將飼官馬在逆旅。屋毀馬斃。到京。公旋大拜。時魏義通以檢校常侍代鎮三城。裨將當還。緣馬死。懼帥之責。以狀請一字爲押。公援筆判曰。廐焚魯國。先師惟恐傷人。屋倒闕鄉。常侍豈宜問馬。

新野庾倬。貞元初。爲河南府兵曹。有寡姊在家。時洛中物價翔貴。難致口腹。庾常於公堂輟己饌以餉其

姊始言所愛小男以餉之。同官初甚鄙笑。後知之。咸嘉歎。倬生簡休。

滎陽鄭還古。少有俊才。嗜學。而天性孝友。初家清齊間。遇李師道。漸阻王命。扶持老親。歸洛。與其弟自昇肩輿。晨暮奔迫。兩肩皆瘡。妻柳氏。僕射元公之女也。婦道克備。弟齊古好博戲賭錢。還古帑藏中物。雖妻之貲玩。恣其所用。齊古得之輒盡。還古每出行。必封管鑰付家人。曰。留待二十九郎償博。勿使別爲債息。爲惡人所陷誤也。弟感其意。爲之稍節。有堂弟浪跡。好吹鬻。投許昌軍爲健兒。還古使使召之。自與洗沐。同榻而寢。因致書所知之。爲方鎮者。求補他職。姻族以此重之。而竟以剛躁。喜持論。不容於時。惜也。

劉司徒玄佐。滑州匡城人。嘗出師經其本縣。欲申桑梓之禮於令。令堅辭不敢當。玄佐歎恨久之。先是陳金帛數筐。將遺邑僚。以其愚懦而止。玄佐貴爲相。其母月織絹一疋。以示不忘本。每觀玄佐視事。見邑令走階下。退必語玄佐。吾向見長官。白事卑敬。不覺恐悚。思乃父爲吏本縣。時常畏長官汗慄。今爾當廳據案待之。其何安焉。因喻以朝廷恩寄之重。須務捐軀。故玄佐始終不失臣節。是時鄉里姻舊。以地近。多投之。司徒不欲以私擢居將校之列。又難置於賤卒。盡署爲將判官。此職例假緋衫銀魚袋。外示榮之。實處散冗。其類漸衆。久之。有獻啓訴於公者。其一聯云。覆盆子落地變作赤烘。羊羔兒作聲盡是沒益。公覽之而笑。各改署他職。

太子陸文學鴻漸名羽。其先不知何許人。竟陵龍蓋寺僧。姓陸。於堤上得一初生兒。收育之。遂以陸爲氏。

及長。聰俊多能。學贍辭逸。談諧縱辯。蓋東方曼倩之儔。與余外祖戶曹府君。外族柳氏。外祖洪府戶曹。諱澹。字中庸。別有傳。交契深至。外祖有賤事狀。陸君所撰。性嗜茶。始創煎茶法。至今鬻茶之家。陶爲其像。置於煬器之間。云宜茶足利。余幼年尙記識一復州老僧。是陸僧弟子。常諷其歌云。不羨黃金罍。不羨白玉杯。不羨朝入省。不羨暮入臺。千羨萬羨西江水。曾向竟陵城下來。又有追感陸僧詩至多。

崔吏部樞夫人。太尉西平王女也。西平生日。中堂大宴。方食。有小婢附崔氏婦耳語。久之。崔氏婦頷之而去。有頃。復至。王問曰。何事。女對曰。大家昨夜小不安適。使人往候。王擲筯怒曰。我不幸有此女。大奇事。汝爲人婦。豈有阿家體候不安。不檢校湯藥。而與父作生日。吾有此女。何用作生日。爲遽遣走。檐子歸身亦續至。崔氏家問疾。且拜謝教訓子女不至。姻族聞之。無不愧歎。故李夫人婦德克備。治家整肅。貴賤皆不許時世粧梳。勳臣之家。特數西平禮法。

裴濟爲陝府錄事。參軍李洸公勉除長使。充觀察。始至官。屬吏謁訖。令別召裴錄事。坐與之語。面約云。少頃有燕。便請隨判官同赴。及燕。凡三召不至。公極怒。明晨召濟讓之曰。某忝公之官長。以素聞公名。兼朝中親友。話公美事。思接從容。故超禮分。面約赴燕。遂累召不來。何相忽之甚也。濟正色言曰。中丞細思之。未知誰失。必也正名。各司其局。古人所守。某敢忘之。中丞使府自有賓僚。某走吏也。安得同之。洸公曰。老夫過矣。請吾子歸所止。濟既退。洸公遽命駕訪之。拜請置在賓席。濟之子充爲太常寺太祝。年甚少。時京司書考官之清高者。例得上考。充之同儕。以例皆止中考。訴於卿長曰。此舊例也。充曰。奉常

職重地高。不同他寺。大卿在具瞻之地。作事當出於人。本設考課。爲獎勤勞。則書豈繫於官秩。若一以官高下爲優劣。則卿合書上上考。少卿合上中考。丞合中上考。主簿合中考。協律合下考。某等合喫杖矣。卿笑且慚。遂特書上考。游後累遷同州刺史。所在有能名。充至湖州刺史。

崔相國羣爲華州刺史。鄭縣陸鎮。以名與崔公近。諱音同。請假。崔視事後。遍問官屬。恠鎮不在列。左右以迴避對。公曰。縣尉旨授官也。不可以刺史私避。而使之罷不治事。召之令出。鎮因陳牒。請權改名。公判准狀。仍戒之曰。公庭可以從權。簿書則當仍舊。臺省中無陸瑱名也。其知大體如此。

柳元公善張尙書正甫。元公之子仲郢。嘗遇張於途。去蓋下馬而拜。張止之不獲。他日張言於元公曰。壽

郎則小僕射之小字也

相逢。其謙太過。元公作色不應。久之。張起去。元公謂客曰。張正甫與公綽往還。欲使兒於街中騎馬衝公綽耶。此人亦不足與語。張聞之。拜謝。元公爲西川從事。嘗納一姬。同院知之。或徵出其妓者。言之數四。元公曰。士有一妻一妾。以主中饋。備灑掃。公綽買妾。非妓也。

范陽盧仲元。家于壽之安豐。其妻清河崔氏。率更令謙姪女也。崔氏兄。卽有薄田百畝。在洛城之東。守道力田。以自給。未嘗干人。常躬耕得金一瓶。計百兩。不言於人。密埋于居室內。臨終。其妻李氏。以家貧。子幼。身後凍餒爲憂。崔屏人。語妻以埋金之事。指其記處。戒云。慎勿言於人。他日。盧郎中來。可告也。未幾。盧赴調。經洛中。吊崔氏之孤。訖。李使婢傳語曰。新婦有哀迫之事。須面見姑夫。盧許之。旣見。乃述亡夫之意。盧悲泣久之。曰。惟嫂之命。李氏仍密遣所使之謹厚者。持金付之。盧遂罷選。持金鬻于揚州。時遇

金貴兩獲八千。復市南貨入洛。爲崔孤置田宅。兼爲剖分家事。旣畢而歸。踰年方選。竟未嘗言於人。惟密親有知者。盧君生旣字子嚴。清望重器。爲世名臣。信陰德之報也。

有讀蕭氏集。問功曹是誰子孫。及有後否。余應之曰。梁高祖武皇帝。父諱順之。齊書有傳。武帝受禪。武尊

文帝。文帝第三子恢。封鄱陽王。薨諡忠烈。恢生宜豐侯循。循生唐太子太保造。造生武威大將軍夙。夙

生雅州都督善義。善義生左衛錄事參軍元恭。元恭生密縣主簿旻。旻生楊府功曹諱穎士。字茂挺。門

人諡曰文元先生。先生一子存。字伯誠。爲金部員外郎。諒直有功曹之風。時裴延齡爲戶部尙書。恃恩

姦佞。與張滂不叶。金部惡延齡之爲人。棄官歸廬山。以山水自娛。識者甚高之。終于檢校倉部郎中。生

三子。皆無祿。早世。無後。惟次子東。從事邑南。有二子。今皆流落江湖。假吏州縣。功曹以其子妻。門人柳

君諱澹。字中庸。卽余之外王父也。韓文公少時。常受蕭金部知賞。及自袁州入爲國子祭酒。途經江州。

因遊廬山。過金部山居。訪知諸子凋謝。惟二女在。因賦詩曰。中郎有女能傳業。伯道無兒可主家。今日

匡山過舊隱。空將衰淚對烟霞。留百縑以拯之。或傳功曹爲李林甫所召時。在禪制中謁見林甫。薄之。

不復用。蕭遂作伐櫻桃樹賦以刺此。蓋不與者所誣也。功曹孝愛著於士林。李吏部華稱其冒難葬親。

豈有越禮之事。此事且下蕭公數等者。不爲余嘗聞外族長老說。林甫聞功曹名。欲見之。知在艱棘。後

聞禪制已畢。令功曹所厚之人導意。請於蕭君所居側僧舍一見。遂許之。林甫出中書至寺。自以宰輔

之尊。意謂功曹便於下馬處趨見。功曹乃於門內哭以待之。林甫不得已前吊。由此怒其恃才。敢與宰

相敵禮。竟不問。後余見今丞相崔公鉉說正同。崔公外祖母柳夫人。亦余族姨。卽李北海之外孫也。柳夫人聰明強記。且得於其外族。可爲實錄。

余座主隴西公爲臺丞。奏今孔尙書溫。丞相徐公商爲監察。及孔爲中丞。隴西公淹恤在外多年。除宗正少卿歸朝。而孔徐二公。並時爲丞相。每讌集時。人以其爲盛事。亦可太息於宦途也。

唐尙書特太和六年。尉渭南爲京兆府試進士官。杜丞相悰時爲京兆尹。將託親知間等第。時重十人。內爲等第。

召公從容兼命茶酒。及語舉人。則趨而下階。俯伏不對。杜公竟不敢言而止。是年上等內近三十餘人。數年內。皆及第無缺落者。前後莫比。時余偶在等第之選。

權寔子範爲殿中侍御史知巡。有小吏從市求取者。事發笞臀十數。他日復有如此者。白於臺長。杖背十五。同列疑其罪同。罰異。權對曰。前吏所取者。名屬左軍。臺之威令。不振久矣。百司尙有不稟奉者。況憑禁軍之勢耶。彼受賄於此輩。且是知抑豪強。可以未減。後吏則挾臺之威。恐嚇百姓。杖背全命。猶爲至輕。

張傑夫前自襄州從事。至京。先到臺中。三院多張之親友。爲求馬價。同列有或怒或嗤。而不署文字者。權獨先署。謂衆曰。某向不與張君熟。且聞其在窮喪馬。正當求祿求知之際。不可使徒行。且一緡何足爲輕重。若使小生薦所不知之人。實不從衆署狀。

刑部郎中元沛妻劉氏。全白之妹。賢而有文學。著女儀一篇。亦曰直訓。夫人旣寡居。奉玄元之教。受道錄。

於吳筠先生。精苦壽考。長子固。早有名。官歷省郎。刺史。國子司業。次子察。進士及第。累佐使府。後高臥廬山。察之長子澐。好道不仕。次子充。進士及第。亦尙靈玄矣。

因話錄卷第四

角部 角爲人。凡不仕者皆入此部。

元和初南嶽道士田良逸。蔣含弘。皆道業絕高。遠近欽敬。時號田蔣。田以虛無爲心。和煦待物。不事浮飾。而天格清峻。人見者褊恹盡去。呂侍郎渭。楊侍郎憑。相繼廉問湖南。皆北而師事。潭州大旱。祈禱不獲。或請邀致先生。楊公曰。田先生豈爲人祈雨者耶。不得已迎之。先生蓬髮弊衣。欣然就輦。到郡亦終無言。卽日降雨。所居嶽觀。內建黃籙壇。法具已陳。而天陰晦。弟子請先生祈晴。先生亦無言。岸幘垂髮而坐。及行齋。左右代整冠履。扶而昇壇。天卽開霽。嘗有村姥。持一碧絹襦來奉先生。先生對衆便著之。在坐者竊笑。先生不以介意。楊公嘗迎先生至潭州。先生方洗足。使到乘小舟便行。侍者以履襪追及于衙門。先生卽于門外坐。輒階著襪。旁若無人。楊再拜亦不止之。喜飲酒。而言不及吉凶是非。及楊自京尹謫臨賀尉。使使候先生。兼遺銀器。先生受之。便悉付門人。作法會。使還。先生曰。報汝阿本郎。不久卽歸。勿憂也。未幾。楊果移杭州長史。良逸未嘗干人。人至亦不逆。不記人官位姓名第。與呂渭分最深。後郎中呂溫刺衡州。因來候之。左右先告。以使君是侍郎之子。及溫入。下牀撫其背曰。爾是呂渭兒子耶。溫泫然降階。田亦不止。其真樸如此。良逸母爲喜。王寺尼。尼衆皆呼先生爲小師。嘗日負薪兩束奉母。或有故不及往。卽弟子代送之。或傳寺尼晨起見一虎在田媪門外。走以告媪曰。此應是小師使送。

柴來不足畏也。蔣君混元之氣，雖不及田，而脩持趣尚亦相類。兄事於田，號爲莫逆。蔣始善符術，自晦其道。人莫知之。後居九貞觀，曾命弟子至縣市齋物，不及期還。語其故云：於山口見一猛獸當路，良久不去。以故遲滯。蔣曰：我在此庇，伊已多時，何敢如此。卽以一符置所見處。明日獸踣符下。蔣聞之曰：我本以符却之，使其不來，豈知不能自脫。旣以害物安用術爲。取符焚之，自此絕不復留意。有歐陽平者，行業亦高。又兄事蔣君。於田君卽隣。于入室。歐陽曾一夕夢三金爐自天而下。若有所召。旣寤，潛告人曰：二先生不久去矣。我繼之。俄而田君蛻去。蔣次之。歐陽亦逝。桐柏山陳寡言、徐靈府、馮雲翼三人，皆田之弟子也。衡山周混沌，蔣之門人也。陳徐在東南，品第比田。蔣而馮在歐陽之列。周自幼入道，科法清嚴，今爲南嶽首冠。

道士陶天活者，安南人居瀕海。海溢，家人悉驚走避水。天活始生，其母挈去不得，舉族悲念，泊水退而歸。其嬰兒在桑之交枝，無恙。抱之啼乳如常。遂以天活爲名。及長，聰慧簡率，真氣內充。自元和至大和，爲供奉道士，朝野歸嚮。

江南多名僧。貞元元和以來，越州有清江、清晝、婺州有乾俊、乾輔。時謂之會稽二清、東陽二乾。

吳興僧晝，字皎然，工律詩，嘗謁章蘇州，恐詩體不合，乃于舟中抒思，作古體十數篇爲贊。章公全不稱賞。晝極失望，明日寫其舊製獻之。章公吟諷，大加歎咏。因語晝云：師幾失聲名，何不但以所工見投，而猥希老夫之意，人各有所得，非卒能致晝大伏其鑒別之精。

元和以來。京城諸僧及道士。尤多大德之號。偶因勢進。則得補署。遂以爲頭銜。各因所業談論。取本教所業。以符大德之目。此猶近于理。至有號文章大德者。夫文章之稱。豈爲緇徒設耶。訛亦甚矣。有似昔歲德宗搜訪懷才抱器不求聞達者。有人於昭應縣逢一書生。奔馳入京。問求何事。答云。將應不求聞達科。此科亦豈可應耶。號欺豐俗。皆此類也。

昔北齊封陽休之爲王。休之曰。我非奴非獠。何故封我爲王。使林遠及陶隱居之徒。當必爲休之恥矣。有文淑僧者。公爲聚衆譚說。假託經論所言。無非淫穢鄙褻之事。不逞之徒。轉相鼓扇扶樹。愚夫冶婦。樂聞其說。聽者填咽。寺舍瞻禮崇奉。呼爲和尚。教坊效其聲調。以爲歌曲。其毗庶易誘。釋徒苟知真理。及文義稍精。亦甚嗤鄙之。近日庸僧以名繫功德使。不懼臺省府縣。以士流好窺其所爲。視衣冠過於仇讎。而淑僧最甚。前後杖背。流在邊地數矣。

元和中。僧鑒虛。本爲不知肉味。作僧素無道行。及有罪伏誅。後人遂作鑒虛煮肉法。大行於世。不妨他僧爲之。置于鑒虛耳。亦猶才命論稱張燕公。革華傳稱韓文公。老牛歌稱白樂天。佛骨詩稱鄭司徒。皆後人所誣也。故其辭多鄙淺。

盧子嚴說。早年隨其懿親鄭常侍東之。同遊宣州當塗。隱居山巖。卽陶貞白鍊丹所也。鑪跡猶在。後爲佛舍。有僧甚高潔。好事因說其先師名彥範。姓劉。雖爲沙門。早究儒學。邑人呼爲劉九經。顏魯公。韓晉公。劉忠州。穆監寧。獨孤常州。皆與之善。各執經受業者數十人。年八十。猶精強。僧行不虧。性頗嗜酒。飲亦

未嘗及亂。學徒有攜壺至者。欣然而受之。每進三數盃。則講說方銳。所居有小圃。自植茶爲鹿所損。人勸以垣隔之。諸名士悉樂爲運石共成。穆兵部贊事之最謹。嘗得美酒。密以小瓷壺置于懷中。累石之際。因白師曰。有少好酒。和尙飲否。彥範笑而傾飲。滿似酣。則語穆曰。不用般石。且來聽書。遂與剖析。微與。至多不倦。鄭君更徵其遺事。僧歎息久之曰。近日尊儒重道。都無前輩之風。因出一紙。穆兵部與書。傾寒暄之儀。極卑敬。其略曰。某偶忝名宦。皆因善誘。自居班列。終日塵屑。却思昔歲臨清澗。蔭長松。接待座下。獲聞微言。未知何時復遂此事。遙瞻水中月。嶺上雲。但馳攀想而已。和尙薄於滋味。深於酒德。所食僅同嬰兒。所飲或如少壯。常恐尊體有所不安。中夜思之。實懷憂戀。其誠切如此。月日之下。但云門人姓名。狀上和尙法座前。不言官位。當時嗜學事師。可謂至矣。又云有耆宿僧總持。彥範之友也。爲人清苦。一生未曾干人。惟自墾山種田數畝。給衣食。或遇豐歲多麥。傍有滯穗。度知其主必不收者。拾之以歸。若可惜者。則求而積之。召主以付。不至則置于路口。其獨行如此。

角部之次

元和十五年。淮南裨將譚可則。因防邊爲吐蕃所掠。初到蕃中。蕃人未知憲宗棄天下。日夜懼王師復河。惶不安寢食。可則旣至。械繫之置地牢中。絕其飲食。考問累至。可則具告以大行昇遐。蕃人尙未之信。其傍有知書者。可則因略記遺詔示之。乃信焉。蕃法刻木爲印。每有急事。則使人馳馬赴贊府牙帳。日行數百里。吏者上馬如飛。虜爲馬吏。服得可則審憲皇崩問之狀。先是每得華人。其無所能者。便充所

在役使。輒黥其面。麤有文藝者。則涅其臂。以候贊普之命。得華人補爲吏者。則呼爲舍人。可則以曉文字。將以爲知漢書舍人。可則不願。其舊舍人有姓崔者。本華人。可則嘗于靈武相識。其人大爲蕃帥所信。爲言之得免。可則前後數逃歸。輒爲候者所得。蕃帥雖不殺。以皮鞭榜之。凡數百。竟得脫。凡在蕃六年。及歸。詣闕自陳。敕付神策軍前馳使。未及進用。爲軍中沙汰。因配在浙東。止得散將而已。竟無官。開成四年。余于越州遇之。見其步履不快。云于蕃中走時凍損足。視其臂一字尙存。譯云。天子家臣。可則亦細言河湟可復之狀。聽其語。猶微染戎音。

諧戲附

玄宗問黃幡綽。是勿兒得人憐。

是勿兒。猶言何兒也。

對曰。自家兒得人憐。

時楊貴妃寵極中宮。號祿山爲子。肅宗在春宮。常危懼。上聞幡綽言。俛首久之。

上又

嘗登苑北樓。望渭水。見一醉人臨水臥。問左右是何人。左右不知。將遣使問之。幡綽曰。是年滿令史。上問曰。汝何以知。對曰。更一轉入流。上笑而止。上又與諸王會食。寧王對御坐。歎一口飯。直及龍顏。上曰。

寧哥何故錯喉。幡綽曰。此非錯喉。是歎噫。

幡綽優人。假戲謔之言。警悟時主。解紛救禍之事甚衆。眞滑稽之雄。

周愿常奉使魏州。節度使田季安引之連轡。路周一驢極肥。季安指示愿曰。此物大王世充。應聲答曰。總是小竇。建德李尙書選。性嚴毅。不好戲笑。時愿知江西鹽鐵留後事。將至。季公戒從事曰。周生好諧謔。忝僭無禮。幸諸賢稍莊以待之。及愿至。數燕。季公寒溫外。不與之言。周亦無由得發。一日饌親賓。愿亦預焉。季公有故人子弟來投。落拓不事。季公遍問舊時別墅。及家童有技者。圖書有名者。悉云賣却。季

責曰：郎君未官，家貧產業從賣，何至賣及書籍古畫？惆悵久之，復問曰：有一本虞永興手寫尙書，此猶在否？其人慚懼，不敢言賣。云暫將典錢，愿忽言曰：尙書大屯。李公忘却，先拒其談諧之事。遂問曰：尙書何屯？愿曰：已遭堯典舜典，又被此兒郎典。李公興怒之意大開，自此更不拒周。一日後，洪之屬邑民產一子，有三首。李公覽狀惡之，久不懌，愿曰：留待長大，令試幞頭。

李紓侍郎好諧戲，又服用華鮮，嘗朝回，以同列入坊門，有負販者呵不避，李罵云：頭錢價奴兵，輒衝官長，負者顧而言曰：八錢價措大，漫作威風。紓樂採異語，使僕者誘之至家，爲設酒饌，徐問八錢之義，負者答曰：只是衣短七耳，同列以爲破的，紓甚慙。下人呼舉不正，故云短也。

京兆龐尹及第後，從事壽春，有江淮舉人姓嚴，是登科記誤本，倒書龐嚴姓名，遂賃舟丐食，就謁時，郡中止有一判官，亦更不問其氏，便詣門投刺，稱從姪，龐之族人甚少，覽刺極喜，延納殷勤，便留款曲，兼命對舉七筭，久之，語及族人，都非龐氏之事，龐方訝之，因問止竟，郎君何姓？曰：某姓嚴，龐撫掌大笑曰：君誤矣，余自姓龐，預君何事，揖之令去，其人尙拜謝叔父，從容而退。

姚峴有文學，而好滑稽，遇機卽發，姚僕射南仲廉察陝郊，峴初釋艱服，候見以宗從之舊，延於中堂，吊訖未語及他事，陝當兩京之路，賓客謁無時，門外忽有投刺者云：李過庭，僕射曰：過庭之名甚新，未知誰家子弟，客將左右皆稱不知，又問峴知之否，峴初猶俛首，頰之自不可忍，斂手言曰：恐是李趨兒。

盧尚書弘宣與弟盧衢州簡辭同在京。一日衢州早出。尚書問有何除改。答曰。無大除改。惟皮遐叔蜀中刺史。尚書不知皮是遐叔姓。謂是宗人。低頭久之。曰。我弭當家。沒處得盧皮遐來。衢州爲辯之。皆大笑。有人說李寰建節晉州。表兄武恭。性誕妄。又稱好道。及蓄古物。遇寰生日。無餉遺。乃箱擎一故皂襖子與寰云。此是李令公收復京師時所服。願尚書功業一似西平。寰以書謝。後聞知恭生日。箱擎一破膩脂。僕頭餉恭曰。知兄深慕高貞。求得一洪崖先生初得仙時僕頭。願兄得道。一如洪崖。賓僚無不大笑。余嘗讀謝綽宗拾遺錄云。江夏王義恭。性愛古物。常遍就朝士求之。侍中何勗已有所送。而王徵索不已。何甚不平。嘗出行於道。遇狗枷敗犢鼻。乃命左右取之。還以箱擎送之。牋曰。承復須古物。今奉李斯狗枷相如犢鼻。此頗與寰恭相類耳。

衢州視事際。有婦人姓翁。陳牒論田產。稱阿公阿翁在日。下阿翁兩字。言其大父也。坐客笑之。因徵其類。余嘗目覩者。王屋有梓人女曰阿家。京中有阿輔。洪州有阿姑。蜀中有阿母。洛中有阿伯。阿郎。皆因其姓。亦堪笑也。

因話錄卷第五

徵部 徵爲事。凡不爲其人與物而汎說者。皆入此部。

尙書省東南隅通衢有小橋。相承目爲拗項橋。言侍御史及殿中諸郎。久次者至此。必拗項而望南宮也。都堂南門東道有古槐。垂陰至廣。相傳夜深聞絲竹之音。省中卽有入相者。俗謂之音聲樹。祠部呼爲冰聲。應言其清且冷也。

尙書省二十四司印。故事悉納直廳。每郎官交直時。吏人懸之于臂以相授。頗覺爲煩。楊虔州虞卿任吏部員外郎。始置櫃加鑰以貯之。人以爲便。至今不改。櫃初成。周戎時爲吏部郎中。大書其上。戲作考詞狀。當有千有萬。忍俊不禁考上下。

祕書省內有落星石。薛少保畫鶴賀監草書。郎餘令畫鳳。相傳號爲四絕。元和中韓公武爲祕書郎。挾彈中鶴一眼。時謂之五絕。又省之東卽右威衛。荒穢摧毀。其大廳逼校書院。南對御史臺。有人嘲之曰。門緣御史塞。廟被校書侵。

御史臺三院。一曰臺院。其僚曰侍御史。衆呼爲端公。見宰相及臺長。則曰某姓侍御。知雜事。謂之雜端。見臺長。則曰知雜侍御。雖他官高秩兼之。其侍御號不改。見宰相。則曰知雜某姓某官。臺院非知雜者。乃俗號散端。二曰殿院。其僚曰殿中侍御史。衆呼爲侍御。見宰相及臺長。雜端。則曰某姓殿中。最新入知

右巡已次知左巡。號兩巡使。所主繁劇。及遷向上。則又入推。益爲勞屑。惟其中間。則入清閑。故臺中諺曰。免巡未推。只得自如。言其暢適也。廳有壁畫。小山水甚工。云是吳道玄真跡。三曰察院。其僚曰監察御史。衆呼亦曰侍御。見宰相及臺長雜端。則曰某姓監察。若三院同見臺長。則通曰三院侍御。而主簿紀其所行之事。每公堂食會雜事。不至則無所檢轄。惟相揖而已。雜事至。則盡用憲府之禮。雜端在南揖。主簿在北揖。兩院則分坐。雖舉七筭。皆絕談笑。食畢。則主簿持黃卷揖曰。請舉事。于是臺院白雜端曰。舉事。欲上堂。三院長各于會堂南廊下。先白雜端云。合舉事。則舉曰。某姓侍御。更有姓同者。則以第行別之。有某過。請准條。主簿書之。其兩院皆若舉時差錯。則最小殿中舉院長。最小侍御史舉殿院長。又錯則向上。人遇舉。若雜端失笑。則三院皆笑。謂之烘堂。悉免罰矣。凡見黃卷。罰直遇赦。悉削臺長。到諸院。凡官吏所罰。亦悉免。御史虛三院雖至美。而月滿殿中。推鞠之勞。憚於轉兩院。以向下侍御史。便領推也。多不願爲。以此臺中以殿中轉兩院爲戲。諺之辭。每出入行步。侍御史在柱裏。殿察兩院在柱外。有時殿中入柱裏。則共哈之曰。著直略去也。三院御史主簿有事。白端公就其廳。若有中路白事。謂之蓼端。蓼端有罰。殿中已免巡過。正知巡者假故。則向上人。又權知謂之蘸巡。臺官有親愛除拜喜慶之事。則謁院長。雜端臺長謂之取賀。凡此皆因胥徒走卒之言。遂成故事。院長每上堂了各報。諸御史皆立於南廊。便服鞞鞋以俟。院長立定。院長方出。相揖而序。行至殿院門揖殿中。又序行至食堂門。揖侍御史。凡入門至食。凡數揖。大抵揖者。古之肅拜也。臺中無不揖其酒。無起謝之禮。但云揖酒而已。酒最合敬。以恐煩却損。往往自臺拜他官執事。亦誤作臺

揖人皆笑之。每赴朝序行，至待漏院偃息，則有臥揖。上門有馬揖。凡院長在廳院內，御史欲往他院，必先白。決罰又必先白。察院有都廳，院長在本廳，諸人皆會話于都廳。亦曰御史初上，後遇雜端上堂，則舉三犯舊條並不罰。其察院南院會昌初，監察御史鄭路所葺禮祭廳，謂之松廳。南有古松也。刑察廳謂之甕

廳。寢于此。多甕兵。察常主院中茶。茶必市蜀之佳者。貯于陶器，以防暑濕。御史躬親緘啓，故謂之茶餅。

廳吏察主院中入朝人次第名籍，謂之朝簿。廳吏察之上，則館驛使館驛使之上，則監察使。監察使同

僚之冠也。謂之院長。臺中敬長，三院皆有長。察院風彩尤峻。凡三院御史初拜未朝謝，先謁院長。院長

辭疾不見，則不得及上矣。諸家御史臺記多載：當時御史事跡，戲笑之言，故事甚略，堂中有儀注，近漸遺闕，雖有版勝，亦但錄一時要節，自此轉恐磨滅矣。因與親友話及此，遂粗疏之。

北省班諫議在給事中上，中書舍人在給事中下。裴尙書休爲諫議大夫，形質短小，諸舍人戲之曰：如此

短何得向上立。裴對曰：若恠卽曳向下着。衆皆大笑。後除舍人。

或問東津先生曰：昔人立法，將以利人邪？曰：利之曰：何以後世反爲害也？曰：因其利而奸生，則反害也。燧

人鑽木，致民火食，以熟百物。安知後世有咸陽焚燒宮室，三月不絕之毒。伏羲畫八卦造書契，安知後

世有假鬻文字，以市道欺誑時俗之弊。后稷播百穀，安知後世有權酷閉糴茶鹽求利之苦。軒轅制車

服戎器，安知後世有華澤靡麗相尙，及窮兵黷武之弊。制宮室，安知後世有甲第別館，凌雲耀日，唐虞

建官列爵，安知後世有入金納粟，冒取公侯，禹平水土，別九州，安知後世有山林川澤之稅，關津堰埭

之難。周公制嫁娶之禮，安知後世以依衒姻援，而求富貴。孔子刪詩書，定禮樂，垂五常之教，安知後世

有掠儒之名而盜聲華。叨尊顯。凡此觸類澆訛。流蕩紀綱。大壞其本。豈聖人之過耶。其由聖人啓之耶。其後世爲治者。引而熾之耶。嗚呼。馬肝之說。余不忍言。所可歎者。伊周初以公忠。放主操政。以全國家。安社稷。而莽卓操懿。以降。行滔天之心。援此爲法。尤可悲也。桀紂幽厲。身遭放弑。常與萬世之君。必爲龜鏡。則伊周一時公忠。反誤後世亂臣賊子。桀紂幽厲。一時淫虐。而有益萬世明君矣。善爲政者。有才必用。用必當才。任之而不私之。非才則不任。故使人無棄無濫。天下無一人嘆不遇。而懷過望之事者。臯陶曰。知人則哲。能官人。傅曰。及其使人也。器之。臧僖伯云。國家之敗。由官邪也。班固稱宣帝。信賞必罰。綜核名實。政事文學法理之士。咸精其能。至于技巧工匠器械。自元成間。鮮能及之。亦足以知吏稱其職。民安其業者也。光武不許館陶公主子爲郎。前代明哲之主。及霸業之君。國朝列聖。躬親庶政。用才使器。著在史籍者多矣。以君上之尊。深居高視。猶于小官小吏。一賞一罰。重慎如此。況輔弼之臣。豈得容易苟且哉。符秦入寇。謝安石用其兄子玄爲帥。以拒之。郗超雖素與不善。聞而歎曰。安爲重舉。親明也。玄心不負舉才也。人皆以爲不然。超曰。吾嘗與玄共府。見其使才。雖履屐間。亦得其任。是以知之。玄果立功於淮淝。破苻秦百萬之衆。郗嘉賓之言。亦可謂至公矣。今之人。徒私于所親。無安石之明。徒憎所不善。無嘉賓之論。可悲矣。李林甫姦邪陰賊。妬嫉賢能。至于善守章程。深得宰相之體。當時雖正直有名之士。多被搆害。而守尋常仕進者。各獲其分。至今人有以右座呼之而不名也。非其在下有感之者乎。韓晉公節制三吳。多歷年所。取賓佐僚屬。隨其所長。無不得人。嘗有故舊子弟。投之與語。更無

能解。召之與譏。而觀之畢席。端坐不旁視。不與比坐交言。數日。署以隨軍令監庫門。使人視之。每早入。惟端坐。至夕。警察吏卒之徒。無敢濫出入者。竟獲其力。

裴先德泊在中書。有故人官亦不卑。自遠相訪。裴公給恤優厚。從容款洽。在其第無所不爲。乘間求京府判司。裴公曰。公誠佳士。但此官與公不相當。不敢以故人之私。而墮朝廷綱紀。他日有瞎眼宰相憐公者。不妨却得。某必不可。其執守如此。嗚呼。上不慎名器。是以厮養待賢也。下不慎名器。是以嬰孩奉君。而削弱朝廷也。遂致猥濫訛弊。流蕩可憂。不知誰之咎也。已上二章偶曾論及。坐有相知者。因附於此。

王并州璠。自河南尹拜右丞相。除目纔到。少尹侯繼有宴。以書邀之。王判書後云。新命雖聞。舊銜尙在。遽爲招命。堪入笑林。洛中以爲話柄。故事。少尹與大尹遊宴禮隔。雖除官。亦須候正敕也。

有人撰集恠異記。傳云。玄宗令道士葉靜能書符。不見國史。不知葉靜能中宗朝坐妖妄伏法。玄宗時有道術者。乃法善也。談話之誤。差尙可。若著于文字。其誤甚矣。

又有人檢陸法言切韻。見其音字。遂云。此吳兒。真是翻字太僻。不知法言是河南陸。非吳郡也。

又有書生讀經書甚精熟。不知近代事。因說駱賓王。遂云。某識其孫李少府者。兄弟太多。意謂駱賓。是諸王封號也。今人往往說舊云。準皇太子教。不知皇太子合稱令。稱教。乃王公也。此皆不知根本之誤也。人道尙右。以右爲尊。禮先賓客。故先讓客。主人在東。蓋自卑也。今之人。或以東讓客。非禮也。蓋緣所任在地。所主在東。俗有東行南頭之戲。此乃貴其爲一方一境之主也。記曰。天子無客禮。莫敢爲主焉。故君

適其臣。升自阼階。不敢有其室也。注云。明饗君非也。今之方鎮。刺史入本部。於令長以下。禮絕賓主。猶近君臣。至于藩鎮。經管內支郡。則俱是古南面諸侯。但使職監臨。如臺省之官。至外地耳。既通讌饗。則異君臣。而用古天子升阼階之儀。昧于禮經。遂同僭擬。是不講貫所致。又小人姑息訛謬相承。亦可笑且歎也。近見會補闕。實引禮記鄉飲酒儀。言東方仁。仁者主人之位。四方義。義者賓之位。此理亦至當矣。

古者三公開閣。郡守比古之侯伯。亦有閣。所以世之書題有閣下之稱。前輩呼刺史太守。亦曰節下。與宰相大僚書。往往呼執事。言閣下之執事人耳。劉子玄爲史官。與監修宰相書。呼足下。韓文公與使主張僕射書。呼執事。卽其例也。其記室本繫王侯賓佐之稱。他人亦非所宜。執事則指斥其左右之人。尊卑皆可通稱。侍者士庶可用之。近日官至使府御史及畿令。悉呼閣下。至于初命賓佐。猶呼記室。今則一例閣下。亦謂上下無別矣。其執事纔施於舉人侍者。止行于釋子而已。今又布衣相呼。盡曰閣下。雖出于浮薄相戲。亦是名分大壞矣。又中表疎遠卑行。多有座前之目。尤可懲恠。夫閣下去殿下一階。座前降几前一等。此之乖僭。其可行耶。宗從叔姑及姨舅之行。施之可也。近見房州刺史李使君。所著資假。亦與此說相符耳。

漢書載張騫窮河源。言其奉使之遠。實無天河之說。惟張茂先博物志說。近世有人居海上。每年八月。見海槎來。不遠時。齋一年糧。乘之到天河。見婦人織。丈夫飲牛。遣問嚴君平云。某年某月某日。客星犯牛斗。卽此人也。後人相傳云。得織女支機石。持以問君平。都是憑虛之說。今成都嚴真觀。有一石。俗呼爲支機石。皆目云。當時君平留之。寶曆中。余下第還家于京洛。途中逢官差遞夫昇張騫槎。先在東都禁

中。今准詔索有司取進。不知是何物也。前輩詩往往有用張鷟槎者。相襲謬誤矣。縱出雜書。亦不足據。高宗朝改門下省爲東臺。中書省爲西臺。尙書省爲文昌臺。故御史臺呼爲南臺。南朝同也。武后朝御史臺有左右肅政之號。當時亦謂之左臺右臺。則憲府未曾有東西臺之稱。惟俗間呼在京爲西臺。東都爲東臺。李栖筠爲御史大夫。後人不名者。呼爲西臺。又不知出何故事。豈以其名上栖字。遂呼之耶。又呼杜門下黃裳。案下有闕文。爲當致敬。安得輒廢。若妖神淫祀。無名而設。苟有識者。固當遠之。雖嶽海鎮瀆名山大川帝王先賢。不當所立之處。不在典籍。則淫祀也。昔之爲人生無功德可稱。死無節行可獎。則淫祀也。當斧之火之。以示愚俗。又何謁而祀之哉。神飯在禮宜拜受。其他則以巫覡之餉可揮而去也。爲吏宜鑒之。

有士人退朝。詣其友生。見衲衣道人在坐。不懌而去。他日。謂友生曰。公好衣毳褐之夫。何也。吾不知其賢愚。且覺其臭。友生應曰。毳褐之臭外也。豈甚銅乳。銅乳之臭。並肩而立。接跡而趨。公處其間。曾不嫌恥。反譏余與山野有道士遊。南朝高人。以蛙鳴蒿萊勝鼓吹。吾視毳褐。愈于今之朱紫遠矣。

下輩不通義理者。使之寫文字。甚誤。悉同一本。若宦字。仕宦。合著。臣妾之臣。多作官。職官。合著。目也。榮字。榮水在榮陽。合著水也。多

作榮。榮枯合著水。或多誤著榮。榮。合著火。髭鬚。合著須。多著資。鬚髮。合著資。又偏旁只較一點一畫。而義全不通。若棹

棹船從。掉。掉尾。楊柳從。掉。從于楊木。揚。揚州。從于棒。棒。棒枝。從于捧。捧。捧字。從于傳。傳。經傳。無點。師傳及人。姓有點。沐。無點者。音述。有。沐浴也。古沐陽縣。氏

無點者

姓氏。氏。有點者。古惟悵。

上思惟。下憫悵。並從心。

帷帳。此並從巾。

賜惕。並無橫畫。

又錫。錫錫之字。無橫畫。音先樂反。

錫。毛詩鑿錫。左傳錫鷲字有橫畫。

皆音

場。璵場字音易。

若此者衆矣。辨文字者。勿以爲小事而不留意也。

武宗皇帝廟諱暎。改兩火相重。其偏傍言談字已改爲譚。淡改爲澹。其噉字俗多不定。舊或書餒。餒音譚。爾雅訓進。本非飯食名。世重餅噉。庖人以意相傳。及下俚。凡關食物。偏傍盡從食。又噉字聲不同。索前史及諸家并佛經。多作口邊。敢其音與著兩火同。徒敢反。又玉篇切韻。噉字是正也。著兩火俗也。並徒敢反。正合作噉。不疑矣。噉馬卽合用噉字。音徒濫反。以義言之。以物自食謂之噉。以物餒人謂之噉。又案漢書高帝紀云。使酈食其。陸賈往說。將噉以利。顏監注曰。噉者本謂食噉耳。音徒敢反。以食餒人。令其噉食。則改變爲徒濫反。今以利誘之。取實爲辭也。顏監講噉字。雖未分明。亦無口傍。兩火之說則明。是字俗相傳。而後人爲姓。亦因俗耳。近日書餅噉字。至有食邊口邊作覃。及口邊作詹者。率意而爲。其誤甚矣。切韻是尋常文書。何不置之。几案旋看也。

因話錄卷第六

羽部

南人長林中。大樹謂之有神。云近此伐木。則必神怒致禍。□□乃斧他人之樹。爲主所訴。官捕而鞠之。當以盜論。其家質田以賂獄吏。鬻衣以備囚糧。卒不免笞背。皆被瘡而歸。此乃避禍而速禍也。又有里人爲隣巫所惑。而常有災。宜謝神。乃殺家犢。釀酒聲鼓以祀。時官禁屠牛私釀法甚峻。又當國忌。不合動樂。併犯三罪。爲吏所擒。家長隣保。皆抵重罪。連及數十人。此乃禳災。適所以致災也。其愚如此。洪州優胡曹贊者。長近八尺。知書而多慧。凡諸諸戲。曲盡其能。又善爲水嬉。百尺橋上。不解衣。投身而下。正坐水面。若在茵席。又于水上。鞞而浮。或令人以囊盛之。繫其囊口。浮于江上。自解其繫。至于回旋出沒。變易千狀。見者目駭神竦。莫能測之。恐有他術致之。不爾真輕生也。

軍中有透劍門伎。大燕日。庭中設幄數十步。若廊宇者。而編劍刃爲椽棟之狀。其人乘小馬。至門審度。馬調道端。下鞭而進。錚焉。聞劍動之聲。既過而人馬無傷。宣武軍有小將善此伎。每饗軍則爲之。所獲賞止於三數疋帛而已。一日主者誤漏其名。此將忿恨。訴于所管大將。得復以名入。至呈伎之際。極爲調審。入數步。忽風起。馬驚觸劍。失序。人馬皆斃於刃下。

有士鬻產於外。得錢數百緡。懼川途之難賣也。祈所知納于公藏。而持牒以歸。世所謂便換者。實之衣囊。

一日醉指囊示人曰。莫輕此囊。大有好物。盜在側聞之。其夜殺而取其囊。意其有金也。既開無獲。投牒于水。盜爲吏所捕。得其狀。樞機之發。豈容易哉。此所謂不密而致害也。

進士鄭暈說家在高郵。有親表盧氏。莊近水。有隣人數家。共殺一白蛇。未久。忽大震雷電。雨發洪。數家皆陷溺無遺。惟盧氏當中一家無恙。

竇相易直幼時名祕。家貧。受業村學。教授叟有道術。而人不知。一日近暮。風雪暴至。學童悉歸家不得。而宿于漏屋之下。寒爭附火。惟竇公寢于榻。夜深方覺。叟撫公令起曰。竇祕君後爲人臣。貴壽之極。勉力自愛也。及德宗幸奉天日。公方舉進士。亦隨駕而西。乘一蹇驢。至開遠門。人稠路隘。其扉將闔。公懼勢不可進。聞一人叱驢兼捶其後。得疾馳而入。顧見一黑衣卒呼公曰。秀才已後莫忘此情。及升朝訪得。其子提挈累至大官。吏中榮達。

盧賓客貞白父曰老彭。有道術。兼號知人。元和初。宗人弘宣簡辭。弘正簡求。俱候焉。留坐目之甚久。命貞亦序坐。又目之曰。一行五節度使。可謂盛矣。卒如其言。又族子鏞。初舉進士。就安邑所居謁之。謂鏞曰。爾求名大是美事。但此後十餘年方得。勿以遲晚爲恨。登朝亦得大美官。鏞至長慶元年。始擢第。大中十年。終庶子。簡辭已下。三人親昆弟也。弘宣又簡辭之姨兄弟。皆至八座擁旄。

張曇爲汾陽王從事。家嘗有恠。召術者問之。言以大禍將至。惟休退則免。曇不之信。又方燕賓。席上見血。有巫者聞之。勸其杜門。不納賓客。屏遊宴。曇怒杖之。其後曇言語乖度。公頗銜之。又屢言同列間事。每

獨候見多值公方燕寵姬所不令白事必抑門者令通公謂其以武臣輕忽益不平之後因請公去所任吏遂發怒囚之以聞竟斃于杖。

柳員外宗元自永州司馬徵至京意望錄用一日詣卜者問命且告以夢曰余柳姓也昨夢柳樹仆地其不吉乎卜者曰無苦但憂爲遠官耳徵其意曰夫生則柳樹仆則柳木木者牧也君其牧柳州乎卒如其言。

或傳是陳子諒

李涼公逢吉未掌綸誥前家有老婢好言夢後多有應李公久望除官因訪于婢一日婢晨至慘然公問其故曰昨夜與郎君作夢不是好意不欲說公強之婢曰夢有一人昇一棺至堂後云且置在此不久即移入堂中此夢恐非佳也公聞竊喜俄爾除中書舍人後知貢舉未畢而入相。

都水使者崔綽少年豪俠不拘小節天寶中有方士過其家崔傾財奉之亦無所望方士臨去留藥一丸爲別崔殊不之重埋于牀下燕薊之亂家人避賊崔在後未去忽見牀下有茵甚肥鮮因煮而食之雜以葷味自此體腹輕健至老更無疾病月中視小字夜食生彘元和初猶在年九十餘卒蘇州刺史章公余之祖舅集中所贈崔都水詩者是也向得靈藥便能正爾服之當已輕舉矣其次食所化靈芝不雜葷茹又應反顏住世壽不可量蓋玄中但以有壽無疾酬好施之功而已崔卽蘇州之堂妹壻也。

崔國相羣之鎮徐州嘗以崔氏易林自筮遇乾之大畜其繇曰典策法書藏在蘭臺雖遭亂瀆獨不遇災及經王智興之變果除祕書監也。

長慶中鄂州里巷間人每語輒以牛字助之。又有一僧自號牛師。乍愚乍智。人有忤之者。必云我兄卽到。豈奈我何。未幾而相國奇章公帶平章事節度武昌軍。其語乃絕。而牛師尙存。僧者乃牛公之名也。方知將相之位。豈偶然耶。先是元和初。韓尙書臯在夏口。就加節度使。自後復爲觀察使。長慶三年。崔相國植從刑部尙書除觀察。明年冬。牛公實來。宰臣建節鎮夏口。自牛公始也。

陵崔子年。出書一通。示余曰。劉逸淮在汴時。韓弘爲右廂。虞候王某爲左廂。虞候與弘相善。或譖二人取軍情。將不利於劉。劉大怒。俱召詰之。弘卽劉之甥。因控地碎首。大言數百。劉意稍解。王某年老股戰。不能自辯。劉叱令拉坐。杖三十。時新造赤棒。頭徑數寸。固以筋漆立之不仆。數五六當死矣。韓意其必死。及昏。造其家。恠無哭聲。又謂其懼不敢哭。訪其門卒。卽言大使無恙。弘素與某熟。遂至臥內問之。王曰。我讀金剛經四十年矣。今方得力。記初被坐時。見巨手如簸箕。吸然遮背。因袒示韓。都無撻痕。韓舊不好釋氏。由此始與僧往來。日自寫十紙。及貴。計數百軸矣。後在中書。盛暑時。有諫官因事謁見。韓方洽汗寫經。諫官恠問之。韓乃具道王某事。予職在集仙。常侍柳公常爲予說。

已上並本錄
崔公名壽。

王智輿在徐州。法令甚嚴。有防秋官健交代歸。其妹壻於家中設饌以賀。自於廚中磨刀。將就生割羊脚。磨訖。持之疾行。妻兄自堂走入廚。倉卒相值。鋒正中妻兄心。卽死。所在擒之以告智輿。訊問。但稱過誤。本無惡意。智輿不之信。命斬之。刀輒自刑者手中躍出。徑投於地。三換皆然。智輿異之。乃不殺。余按廣陵烈士傳曰。劉雋。字幼節。遷宛胸令。到官二年。政治清平。爲吏民所親。時縣有友人相過者。主人歡喜。

爲具捕犬。因誤中客。客死。平法者云。主人本有殺心。應當伏辜。雋曰。聞許太子至孝。誤不嘗藥。史官書弒君曰。盡心力以事君。舍藥物可也。今主人與客本無讐恨。但歡喜爲供。有親愛飲食之意。無傷害之心。不幸而死。當以周禮過誤平之。奈何欲用法律。所失一時。兩殺不辜。王法者。拘有常例。不聽。雋曰。界有失禮之民。皆令之罪也。解印綬去。蓋與此事相近。而徐州者。神爲之辯耳。

漢州開元寺。有菩薩像。自頂及焰光坐。都是一段青石。潔膩可愛。雕琢極工。高數尺。會昌毀寺時。佛像多遭摧折。剝缺。惟此不傷絲毫。及再立寺。僧振古寶。而置放西廊。余與京大德。知玄法事。西川從事楊仁贍。同謁楊深于釋氏。好古之士也。瞻敬彌日。而玄心精識。多聞話。其本末云。先是匠人得此石。異之。虔心鑄刻。殆忘淪寢。有美女常器食給之。其人運思在像。都無邪思。久之。怠而妄心生。女乃不至。饑渴既逼。兼毒厲匪體。遂悟是天女。因焚香叩首。悔謝切至。女復來。其病立愈。而像卽成。亦嘗有記錄。因毀寺失其傳焉。寺今再立矣。

元和長慶中。兩京閭巷間相見。多云合是阿舅。及太和以來。文宗欲崇樹外戚。而詐稱國舅者數輩。竟不得其真。合是之說。果有驗矣。

余年小。在江漢。嘗與羣兒戲。以竹箠爲鎗。鳥翎飾其上。裂紙爲旌旗。作戰鬪之像。相向云殺。俄爾立定。又云再殺。不數年。憲宗剪除羣寇。蔡齊二巨猾。相次夷滅。再殺之應也。

太和初。京師有輕薄徒。取貢士姓名。以義理編飾爲詞。號爲舉人露布。九年冬。就戮者多出自文儒。

太和初王潛爲荆南節度使。無故有白馬馳入府門而斃。僵臥塞塗。是歲潛卒。此近馬禍也。

進士陳存能爲古歌詩。而命蹇。主司每欲與第。臨時皆有故不果。許尙書孟容舊相知。知舉日。萬方欲爲申屈。將試前夕。宿宗人家。宗人爲具入試食物。兼備晨食。請存偃息以候時。五更後。恠不起。就寢呼之。不應。前眎之。已中風不能言也。

進士鄭滂在名場歲久。流輩多已崇達。常有後時之歎。一夕忽夢及第。而與章周方同年。當時章氏先期舉人。無周方之名者。益悶悶。太和元年秋。移舉洛中時。章景方居守尙書族弟也。赴舉過陝。尙書時廉察陝郊。詰景方曰。我名弘景。汝兄弘方。汝名景方。兄弟各分吾名一字名之。殊無義也。遂更名周方。滂聞之。極喜曰。吾及第有望矣。四年。周方果同年焉。滂登朝至殿中侍御史。前宣成觀察大夫鄭常說此事。大夫卽滂之再從弟也。子溥。又自說應舉時。曾夢看及第榜。榜上但見大書鳳字。大中元年冬。求解鳳翔。偶看本府鄉貢士紙之首。便是鳳字。至東都試。緱山月聞王子晉吹笙詩。坐側諸詩。悉有鳳字。明年果登第焉。子溥。鄭公之子。

大中九年。沈詢侍郎以中書舍人知舉。其登第門生李彬。父叢爲萬年令。同年有起居者之會。倉部李郎中蟻時在座。因戲諸進士曰。今日極盛。蟻與賢座主同年。時右司李郎中從晦。又在座。戲蟻曰。殊未耳。小生與賢座主同年如何。謂彬州柳侍郎也。衆皆以爲異。是日數公皆詣賓客。馮尙書審則。又柳公座主楊相國之同年。舉坐嗟嘆。侍讀諫議漳說。

河南孔尹溫裕任補闕日。諫討党項事。貶彬州司馬。久之得堂兄尚書溫業書。報云。憲府欲取爾作侍御史。日望勅下。忽又得書云。宰相以右史處之。皆無音耗。一日有鵲喜於庭。直若語狀。孩稚拜且祝云。願早得官鵲。既飛去。墜下方寸紙。有補闕二字。極異之。無幾。却除此官。

鄭又自說早承相國武都公知獎。當時爲大理司直。常嘆滯淹。會張晷欲除大常博士。李公云。鄭司直久屈。必請舉自代。旋遇蕭儂服闋。且要與官。諸坐遂以蕭爲博士。前此有大雲寺僧寶銳者。知人休咎。因問之。銳曰。司直朝官終得。中間且合爲數郡。如何便得。既而以侍御史。歷作河陽浙西淮南。累至檢校郎中。方除比部員外郎。銳師說事亦不常中。此又極驗者。以陰騭要顯。前定之事耳。

王蒙者。與趙門下慢布衣之舊。常知其吏才。及公入相。蒙自前吉州新淦令來謁。公見喜極。給郵甚厚。將擢爲御史。時憲僚數至少。德宗甚難於除授。而趙公秉政。其言多行。蒙坐待繡衣之拜矣。一日偶詣慈恩僧寺。占色者忘其名。蒙問早晚得官。僧曰。觀君之色。殊未見喜兆。此後若干年。當得一邊上御史。蒙大笑而歸。數日。宰臣對趙公乘間奏曰。御史府闕人太多。就中監察尤爲要者。臣欲選擇三數人。德宗曰。非不欲補其闕員。此官須得孤直茂實者充選。料卿祇應取輕薄後生朝中子弟耳。此不如不置。趙公曰。臣之愚見。正如聖慮。欲於錄事參軍縣令中求之。上大喜曰。如此卽朕之意。卿有人未。公因薦二人。其一卽蒙也。上曰。且將狀來。公既出。逢裴延齡。時以度支次對問。公曰。相公奏何事稱意。喜色充盈。公不之對。延齡慍罵而去。云。看此老兵所請得行否。既見上。奏事畢。因問曰。趙憬向論請何事。上曰。趙

憬極公心。因說御史事。延齡曰。此大不可。陛下何故信之。且趙憬身爲宰相。豈諳州縣官績効。向二人又不爲人所稱說。憬何由自知之。必私也。復至。陛下但詰其所自卽知矣。他日上閣問云。卿何以知此二人。公曰。一是故人。一與臣微親。諳熟之上。無言他日。延齡又入。上曰。趙憬所請果如卿料。遂寢不行。蒙却歸故林。而趙公薨於相位。後數年。邊帥奏爲從事。得假御史焉。

相國崔公慎由廉察浙西。左目眇生贅。如息肉。欲蔽瞳人。視物極礙。諸醫方無驗。一日。淮南判官楊員外牧。自吳中越職。饌召于中堂。因話揚州有穆中善醫眼。來爲白府主。請遣書崔相國。鉉令致之。崔公許諾。後數日。得書云。穆生性麤疎。恐不可信。有譚簡者。用心精審。勝穆甚遠。遂致以來。旣見。白崔公曰。此立可去。但能安神不撓。獨斷於中。則必効矣。崔公曰。如約。雖妻子必不使知。譚簡又曰。須用九日。晴明。亭午於靜處療之。若其日果能遂心。更無憂矣。是時月初也。至六七日間。忽陰雨甚。譚生極有憂色。至八九大開霽。問崔公飲酒多少。崔公曰。戶雖至小。亦可引滿。譚生大喜。初公將決意。用譚之醫。惟語大將中善醫者。沈師象。師象贊成其事。是日引譚生於使宅北樓。惟師象與一小豎隨行。左右更無人知者。譚生請公飲酒數杯。端坐無思。俄而譚生以手微捫所患。曰。殊小事耳。初覺似拔之。雖痛亦忍。又聞動剪刀聲。白公曰。此地稍暗。請移往中庭。象與小豎扶公而至於庭。坐旣定。聞櫛焉有聲。先是譚生請好綿數兩染絳。至是以絳綿拭病處。兼傅以藥。遂不甚痛。譚生請公開眼看所贅肉。大如小指。堅如乾筋。遂命投之江中。方遣報夫人及子弟。譚生立以狀報淮南。崔相國復書云。自發醫後。憂疑頗甚。及聞

痊愈。神思方安。後數日。而徵詔至金陵。嗟夫。向若楊君不遇。譚生不至。公心不斷。九日不晴。徵詔遽來。歸期是切。礙其目疾。位當廢矣。安得秉鈞入輔。爲帝股肱。此數事足驗玄助。而公作相之後。譚生已逝。又何命之大薄也。



子 騃 乾

一之種十著雜邪說

述 筠 庭 溫

本館據龍威秘書
本排印初編各叢
書僅有此本

乾膜子

唐 温庭筠述

武元衡

武黃門之西川大宴。從事楊嗣復狂酒。逼元衡大觥不飲。遂以酒沐之。元衡拱手不動。沐訖。徐起更衣。終不令散宴。

鮮于叔明

劍南東川節度鮮于叔明。好食臭蟲。時人謂之蟠蟲。每散令人採拾。得三五升。卽浮之微熱水中。以抽其氣。益以酥及五味熬之。卷餅而啖。云其味實佳。

權長孺

長慶末。前知福建縣權長孺犯事流貶。後以故禮部相國德輿之近宗。遇恩復資。留滯廣陵多日。賓府相見。皆鄙之。將詣闕求官。臨行。羣公飲餞於禪智精舍。狂士蔣傳知長孺有嗜人爪癖。乃於步健及諸傭保處。薄給酌。直得數兩。削下爪。或洗濯未精。以紙裹。候其酒酣。進曰。待御遠行。無以餞送。今有少佳味。敢獻。遂進長孺。長孺視之。忻然有喜色。如獲千金之惠。涎流於吻。連撮噉之。神色自得。合坐驚異。

蕭俛

貞元中。蕭俛新及第時。國醫王彥伯住太平里。與給事鄭雲逵比舍。忽患寒熱。詣彥伯求診候。誤入雲逵第。會候門人他適。雲逵立於中門。俛首趨曰。某前及第。有期集之役。忽患具說其狀。逵延坐。爲診其臂。曰。據脉候。是心家熱風。雲逵姓鄭。若覓國醫王彥伯。東鄰是也。俛赧然而去。

李丹

郎中李丹。典濠州。蕭復處士寄家楚州白田。聞丹之義。來謁之。且無傭保。棹小舟。唯領一朮歲女僮。時方寒。衣復單弊。女僮尤甚。坐於客次。女僮門外求火燎手。且持其靴去。客吏忽云。郎中屈處士。復卽芒屨而入。丹揖之坐。略話平素。復忽悟足禮之闕。矍然乃起。告丹曰。某爲饑凍所迫。高堂慈母。處分令入。關投親。知無奴僕。有一小女僮。便令將隨。參謁朝至此。僮駭恐懼。公衙失所在。客吏已通。取靴不得。去就疎脫。唯惶悚而已。丹曰。靴與履皆一時之禮。古者解襪登席。卽徒跣以爲禮。靴。胡服也。始自趙武靈王。又有何典。據此不足介君子懷。但請述所求意。遂留從容。復頤旨趨。乃云。足下相才。他日必領重事。於是遣使於白田。饋遺復母甚厚。又餞復以匹馬束帛。復後竟爲相。

歐陽詢

長孫無忌嘲詢曰。登博成山字。埋肩不出頭。誰教麟閣上。畫此一獼猴。詢應聲曰。索頭連背暖。襠褌畏肚寒。只緣心溷溷。所以面團團。上大笑。

裴宏泰

裴鈞僕射大宴巡官。裴宏泰後至。鈞不悅。宏泰曰。請在座銀器。盡斟酒滿之。隨飲以賜。宏泰可乎。鈞許之。遂竭座上小酌。至觥船。凡飲皆竭。隨卽填於懷。有銀海受一斗以上。以手捧而飲。盡踏其海。捲抱索馬而去。鈞使人問宏泰方箕踞而坐。所得銀器二百餘兩。不覺大笑。

蕭嵩

蕭嵩欲註文選。見馮光進釋躡鷗云。今之芋子。是著毛蘿蔔。嵩大笑。不爵不觥。非炮非炙。能說諸心。庶乎乾脰之義。

